



შპს ექვთიმა თაყაიშვილის სახელობის
სასწავლო უნივერსიტეტი

დამტკიცებულია აკადემიური საბჭოს

N17 გადაყვეტილებით,

ოქმი N5, 16 აპრილი 2016 წელი

მაგისტრატურის დებულება

თავი I ზოგადი დებულებანი

მუხლი 1. დებულების რეგულირების სფერო

წინამდებარე დებულება შემუშავებულია „უმაღლესი განათლების შესახებ“ საქართველოს კანონის შესაბამისად და აწესრიგებს შპს ექვთიმე თაყაიშვილის სახელობის სასწავლო უნივერსიტეტში (შემდგომში სასწავლო უნივერსიტეტი) მაგისტრატურისა და სამაგისტრო საგანმანათლებლო პროგრამების განხორციელების წესს, აგრეთვე მაგისტრის აკადემიური ხარისხის მინიჭებისათვის აუცილებელ მინიმალურ სტანდარტს.

მუხლი 2. მაგისტრატურის დანიშნულება და მიზანი

1. მაგისტრატურა არის აკადემიური უმაღლესი განათლების მეორე საფეხური, საგანმანათლებლო პროგრამების ერთობლიობა, რომელიც შეიცავს სამეცნიერო კვლევის ელემენტებს.
2. მაგისტრატურა მიზანად ისახავს ბაკალავრის შემდგომი დონის სპეციალისტის ან მკვლევარის მომზადებას და ამზადებს პირს მიღებული კვალიფიკაციით მუშაობისათვის.

თავი II მაგისტრატურაში სწავლა

მუხლი 3. მაგისტრატურაში სწავლის უფლება

1. სასწავლო უნივერსიტეტის მაგისტრატურაში სწავლის უფლება აქვს ბაკალავრს ან მასთან გათანაბრებული აკადემიური ხარისხის მქონე პირს.
2. სასწავლო უნივერსიტეტის მაგისტრატურაში სწავლის უფლება შეიძლება მიენიჭოს უცხოეთის უნივერსიტეტის კურსდამთავრებულს „უმაღლესი განათლების შესახებ“ საქართველოს კანონის 50-ე მუხლის მოთხოვნათა შესაბამისად.

მუხლი 4. მაგისტრატურაში ჩარიცხვის პირობები

1. სამაგისტრო საგანმანათლებლო პროგრამაზე სტუდენტის სტატუსის მოპოვების საფუძველია საერთო სამაგისტრო გამოცდების შედეგები, რომელიც მოიცავს გამოცდების ეროვნული ცენტრის მიერ ჩატარებულ საერთო სამაგისტრო გამოცდას და სასწავლო უნივერსიტეტის მიერ განსაზღვრულ შიდა გამოცდას/გამოცდებს.

2. შიდა გამოცდა ტარდება სპეციალობაში. შესაძლებელია გამოცდა ჩატარდეს უცხო ენაში
3. საგანმანათლებლო პროგრამაზე ჩარიცხულ სტუდენტს, რომელსაც არა აქვს შესაბამისი კომპეტენცია უცხო ენაზე საგანმანათლებლო პროგრამით გათვალისწინებული სასწავლო კურსების შესასწავლად (იმ შემთხვევაში, როცა პროგრამაზე ჩარიცხვის წინაპირობა არ არის გამოცდა უცხო ენაში), სასწავლო უნივერსიტეტი დამატებით სთავაზობს ენის ინტენსიურ სასწავლო კურსს, უნივერსიტეტში არსებულ ტრენინგ ცენტრში.
4. სასწავლო უნივერსიტეტის სამაგისტრო საგანმანათლებლო პროგრამებზე ჩარიცხვა წარმოებს წინასწარ გამოცხადებული მისაღები კონტინგენტის ფარგლებში კონკურსის წესით.

მუხლი 5. საბუთების მიღება

1. მაგისტრანტობის კანდიდატმა სასწავლო უნივერსიტეტის მიმღებ კომისიას უნდა წარუდგინოს განცხადება სასწავლო უნივერსიტეტის რექტორის სახელზე, რომელშიც მითითებული უნდა იყოს მისთვის სასურველი სამაგისტრო საგანმანათლებლო პროგრამა. განცხადებას თან უნდა ერთვოდეს:
 - ა. პირადობის დამადასტურებელი მოწმობა (პასპორტი) და მისი ასლი;
 - ბ. დაბადების მოწმობა და მისი ასლი;
 - გ. ბაკალავრის ან მასთან გათანაბრებული აკადემიური ხარისხის დამადასტურებელი დიპლომისა და დანართის დამოწმებული ასლი;
 - დ. 2 ცალი ფოტოსურათი, ზომით 3X4 (სმ);
 - ე. მიწერის მოწმობის ან სამხედრო ბილეთის ასლი (სამხედრო ვალდებულისათვის);
 - ვ. საგანმანათლებლო პროგრამის შესაბამისი ტიპის საერთო სამაგისტრო გამოცდების ჩაბარების დამადასტურებელი სერტიფიკატის დედანი შეფასებისა და გამოცდების ეროვნული ცენტრიდან (მისი არსებობის შემთხვევაში), ან მაგისტრანტობის კანდიდატის მიერ სამაგისტრო გამოცდებზე მიღებული ქულების ამონაბეჭდი გამოცდების ეროვნული ცენტრის საიტიდან (www.naec.ge).
2. ზემოჩამოთვლილი დოკუმენტების არასრულად წარმოდგენის შემთხვევაში მაგისტრანტობის კანდიდატის განცხადება არ მიიღება.

მუხლი 6. გამოცდაზე დაშვების წინაპირობები

1. მაგისტრანტობის კანდიდატი, რომელიც დადგენილ ვადებში სრულად წარმოადგენს წინამდებარე დებულების მე-5 მუხლით გათვალისწინებულ საბუთებს, აკმაყოფილებს სამაგისტრო პროგრამაზე მიღების წინაპირობებს და იგი დაიშვება სასწავლო უნივერსიტეტის მიერ ორგანიზებულ გამოცდაზე (გამოცდებზე).

2. მაგისტრანტობის კანდიდატი გამოცდაზე (გამოცდებზე) გადის ფაკულტეტის დეკანის წარდგინებით სასწავლო უნივერსიტეტის რექტორის ბრძანებით შექმნილ მიმღები კომისიის წინაშე.

მუხლი 7. მაგისტრატურაში ჩარიცხვა

1. მაგისტრანტობის კანდიდატი, რომელიც წარმატებით ჩააბარებს გამოცდას (გამოცდებს) ჩარიცხება შესაბამის სამაგისტრო საგანმანათლებლო პროგრამაზე.

2. პირი მაგისტრატურაში ჩარიცხება სასწავლო უნივერსიტეტის რექტორის ინდივიდუალური ადმინისტრაციულ-სამართლებრივი აქტით სასწავლო უნივერსიტეტსა და მაგისტრანტობის კანდიდატს შორის გაფორმებული ხელშეკრულების საფუძველზე. სასწავლო უნივერსიტეტის რექტორის ინდივიდუალური ადმინისტრაციულ-სამართლებრივი აქტი უნდა განთავსდეს სასწავლო უნივერსიტეტის ვებ-გვერდზე.

3. მაგისტრატურაში სწავლის პერიოდში მაგისტრანტი სარგებლობს `უმაღლესი განათლების შესახებ` საქართველოს კანონით მინიჭებული უფლებებით, იგი ვალდებულია დაიცვას სასწავლო უნივერსიტეტის წესდება და სხვა შიდა საუნივერსიტეტო აქტები, შეასრულოს ხელშეკრულებით ნაკისრი და საქართველოს კანონმდებლობით დადგენილი მოვალეობები.

მუხლი 8. სემესტრული რეგისტრაცია, რეგისტრაციის გაუქმება

1. მაგისტრანტი სასწავლო პროცესში მონაწილეობისა და კვლევითი სამუშაოს შესრულების უფლებას მოიპოვებს შესაბამისი სემესტრული ადმინისტრაციული და აკადემიური რეგისტრაციის გავლის შემდეგ.

2. მაგისტრანტის მიერ სემესტრული რეგისტრაციის გავლა ნიშნავს მის მზადყოფნას მონაწილეობა მიიღოს სასწავლო პროცესში.

3. მაგისტრანტს, რომელიც არ გაივლის სემესტრულ რეგისტრაციას, უჩერდება სტუდენტის სტატუსი და კარგავს აღნიშნულ სემესტრში კრედიტების მოპოვების უფლებას.

თავი III სამაგისტრო საგანმანათლებლო პროგრამა

მუხლი 9. სამაგისტრო საგანმანათლებლო პროგრამის შემუშავება და წარდგენა

1. სამაგისტრო საგანმანათლებლო პროგრამის შემუშავება ხდება შესაბამისი ფაკულტეტის მიერ;

2.სამაგისტრო საგანმანათლებლო პროგრამას ხელმძღვანელობს (თანახელმძღვანელობს) სასწავლო უნივერსიტეტის შესაბამისი ფაკულტეტის პროფესორი ან ასოცირებული პროფესორი.

3. სამაგისტრო საგანმანათლებლო პროგრამას და პროგრამის ხელმძღვანელს (თანახელმძღვანელს) შესაბამისი ფაკულტეტის დეკანი განსახილველად წარუდგენს შესაბამისი ფაკულტეტის საბჭოს. ფაკულტეტის საბჭოს დადებითი დასკვნის შემთხვევაში სამაგისტრო საგანმანათლებლო პროგრამას და პროგრამის ხელმძღვანელს (თანახელმძღვანელს) ამტკიცებს სასწავლო უნივერსიტეტის აკადემიური საბჭო, რის საფუძველზე გამოიცემა რექტორის ბრძანება.

4. სამაგისტრო საგანმანათლებლო პროგრამას თან უნდა ერთვოდეს სამაგისტრო საგანმანათლებლო პროგრამით განსაზღვრული სასწავლო კურსების სილაბუსები.

5. სამაგისტრო საგანმანათლებლო პროგრამის განხორციელებაში შეიძლება მონაწილეობდეს:

- ა. სასწავლო უნივერსიტეტის პროფესორი ან ასოცირებული პროფესორი;
- ბ. სამაგისტრო საგანმანათლებლო პროგრამით გათვალისწინებული შესაბამისი აკადემიური ხარისხის მქონე მოწვეული სპეციალისტი.

6. სამაგისტრო საგანმანათლებლო პროგრამის ხელმძღვანელი (თანახელმძღვანელი) უზრუნველყოფს სამაგისტრო საგანმანათლებლო პროგრამის, სასწავლო და კვლევითი კომპონენტების განხორციელებაზე კონტროლს, აგრეთვე პარტნიორ ორგანიზაციებთან ხელშეკრულების გაფორმებას.

7. სამაგისტრო საგანმანათლებლო პროგრამა უნდა მოიცავდეს:

- ა. სამაგისტრო საგანმანათლებლო საგანმანათლებლო პროგრამის დასახელებას;
- ბ. მისანიჭებელ აკადემიურ ხარისხს;
- გ. ინფორმაციას (CV) სამაგისტრო საგანმანათლებლო პროგრამის ხელმძღვანელ(ებ)ის შესახებ;
- დ. სამაგისტრო საგანმანათლებლო პროგრამის საკვალიფიკაციო დახასიათებას (სამაგისტრო პროგრამის მიზანი და აქტუალობა, მოსალოდნელი შედეგები, პროგრამის დასრულების შემდეგ კურსდამთავრებულის დარგობრივი კვალიფიკაცია, ცოდნა, კომპეტენცია და უნარ ჩვევები, დასაქმების სფეროები);
- ე. სამაგისტრო საგანმანათლებლო პროგრამაზე მიღების წინაპირობებს;
- ვ. სამაგისტრო საგანმანათლებლო პროგრამის სტრუქტურას;
- ზ. პროგრამაში ჩართული ყველა სასწავლო კურსის/მოდულის სილაბუსს.

მუხლი 10. სამაგისტრო საგანმანათლებლო პროგრამის მოცულობა

1. მაგისტრატურაში სწავლა მიმდინარეობს სამაგისტრო საგანმანათლებლო პროგრამის ფარგლებში.
2. სამაგისტრო საგანმანათლებლო პროგრამა მოიცავს 120 კრედიტს, ერთი აკადემიური წლის განმავლობაში - 60 კრედიტს, ხოლო სემესტრში - 30 კრედიტს. შესაბამისად, სამაგისტრო საგანმანათლებლო პროგრამის ოპტიმალური ხანგრძლივობა 2 წელს შეადგენს.
3. მაგისტრატურაში სასწავლო წელი აგებულია 2 სემესტრიანი პრინციპით.
4. სამაგისტრო საგანმანათლებლო პროგრამა უნდა შედგებოდეს სასწავლო, პრაქტიკული და კვლევითი კომპონენტებისგან და სრულდებოდეს სამაგისტრო ნაშრომის შესრულებითა და მისი საჯარო დაცვით.
5. სასწავლო კომპონენტების შეფასების ფორმები და კრიტერიუმები ასახულია შესაბამისი სასწავლო კურსების სილაბუსებში, ხოლო პრაქტიკული და კვლევითი კომპონენტის შეფასების ფორმები და კრიტერიუმები განისაზღვრება წინამდებარე დებულებით.

თავი IV სამაგისტრო საგანმანათლებლო პროგრამის პრაქტიკული კომპონენტი

მუხლი 11

1. პრაქტიკის მიზანია:

- ა) სტუდენტის მიერ უშუალოდ საწარმოს საქმიანობის დაუფლება და პრაქტიკული უნარ-ჩვევების გამომუშავება;
 - ბ) სასწავლო უნივერსიტეტში მიღებული ცოდნის განმტკიცებისა და გაფართოების ხელშეწყობა;
 - გ) თეორიის პრაქტიკასთან მჭიდროდ შერწყმა, ანუ აკადემიური განათლებისა და თეორიის დაკავშირება რეალურ სამყაროსთან /პრაქტიკასთან;
 - დ) იმ პროცესებში ჩართვა, რომლებიც იოლად მისაღწევი არ არის სასწავლო უნივერსიტეტში (თანამედროვე ტექნოლოგიები, სამუშაო გარემო და საქმიანი ურთიერთობები);
 - ე) სასწავლო პროცესში შექმნილი და ჩამოყალიბებული კომპეტენციების პრაქტიკაში გამოყენება და ახალი ცოდნისა და კომპეტენციების ათვისება;
 - ვ) პრაქტიკული უნარების ჩამოყალიბებისა და განვითარების საფუძველზე მომავალი პროფესიული საქმიანობისათვის მომზადება.
2. სამაგისტრო პროგრამის პრაქტიკული კომპონენტი მოიცავს პრაქტიკის გავლას საგანმანათლებლო პროგრამით განსაზღვრული კრედიტის

მოცულობით იმ ორგანიზაციებში, რომლებთანაც სასწავლო უნივერსიტეტს ხელშეკრულება აქვს გაფორმებული.

3. სპეციალობით მომუშავე მაგისტრანტს უფლება აქვს პრაქტიკა გაიაროს იმ დაწესებულებაში, რომელშიც ის მუშაობს და პრაქტიკით გათვალისწინებული

კრედიტების რაოდენობა მოპოვებულად ჩაეთვლება იმ შემთხვევაში, თუ ის შეასრულებს სილაბუსით გათვალისწინებულ ყველა მოთხოვნას, ვინაიდან საქართველოს განათლებისა და მეცნიერების მინისტრის 2007 წლის 5 იანვრის #3 ბრძანების თანახმად კრედიტის მიღება შესაძლებელია მხოლოდ სტუდენტის მიერ სილაბუსით დაგეგმილი სწავლის შედეგების მიღწევის შემდეგ.

4. პრაქტიკის სამუშაო გეგმა, შუალედური და დასკვნითი პრეზენტაციების შეფასების წესი და კრიტერიუმები გაწერილია პრაქტიკის სილაბუსში.

თავი V სამაგისტრო საგანმანათლებლო პროგრამის კვლევითი კომპონენტი მუხლი

12. კვლევითი კომპონენტის მიზანი და ელემენტები

1. სამაგისტრო საგანმანათლებლო პროგრამის კვლევითი კომპონენტის მიზანია ჩამოუყალიბოს სტუდენტს შერჩეულ სფეროში კვლევის დამოუკიდებელად განხორციელების, მიღწეული შედეგების წარმოჩენისა და საკუთარი მსჯელობის საჯაროდ არგუმენტირებულად წარმოდგენის უნარი. კვლევითი კომპონენტი მოიცავს 30 კრედიტს.

2. სამაგისტრო საგანმანათლებლო პროგრამის კვლევითი კომპონენტი სავალდებულო ელემენტების სახით მოიცავს:

- სამაგისტრო ნაშრომის შესრულებას და დაცვას (30 კრედიტი).

მუხლი 13. სამაგისტრო ნაშრომის თემისა და ხელმძღვანელის შერჩევა

1. სამაგისტრო თემისა და ხელმძღვანელის შერჩევა, შესაბამისი სამაგისტრო საგანმანათლებლო პროგრამის ფარგლებში, წარმოებს მაგისტრანტის მიერ სწავლების მესამე/მეოთხე სემესტრის დაწყებიდან. სამაგისტრო თემის სათაურისა და ხელმძღვანელის რეგისტრაცია წარმოებს სამაგისტრო პროგრამის ხელმძღვანელთან.

2. სამაგისტრო თემის ხელმძღვანელი შეიძლება იყოს დოქტორის ან მასთან გათანაბრებული აკადემიური ხარისხის მქონე სასწავლო უნივერსიტეტის პროფესორი ან ასოცირებული პროფესორი ან საგანმანათლებლო პროგრამაში მოწვეული პირი, რომელსაც აქვს სამაგისტრო თემასთან დაკავშირებულ სამეცნიერო სფეროში კვლევის გამოცდილება.

3. სამაგისტრო თემის არჩევის, თემის ხელმძღვანელის დამტკიცების, ნაშრომის მომზადებისა და დაცვის პროცედურა გათვალისწინებულია სამაგისტრო ნაშრომის შესრულებისა და კომისიაზე დაცვის წესის შესაბამისად.

მუხლი 14. სამაგისტრო თემის ხელმძღვანელი

1. სამაგისტრო თემის ხელმძღვანელი ვალდებულია დაეხმაროს სტუდენტს სამაგისტრო თემის შერჩევაში, გეგმის შედგენასა და ბიბლიოგრაფიის დამუშავებაში, ეტაპობრივად შეამოწმოს თემაზე მუშაობის პროცესი, გამოთქვას შენიშვნები და კვლევის არასწორი მიმართულებით წარმართვის შემთხვევაში დაეხმაროს ავტორს მის კორექტირებაში.

2. იმ შემთხვევაში, თუ ხელმძღვანელი უარს აცხადებს ხელმძღვანელობაზე, იგი ვალდებულია ამის შესახებ არგუმენტირებული და დასაბუთებული განცხადებით მიმართოს სამაგისტრო პროგრამის ხელმძღვანელს, მაგრამ არა უგვიანეს თემის დამტკიცებიდან ერთი თვის განმავლობაში.

თავი V სამაგისტრო ნაშრომის მომზადება, წარდგენა და დაცვა

მუხლი 15. სამაგისტრო ნაშრომი

1. მაგისტრანტის მიერ ჩატარებული დამოუკიდებელი კვლევის შედეგები აისახება მის მიერ შესრულებულ სამაგისტრო ნაშრომში.

2. სამაგისტრო ნაშრომი წარმოადგენს დასრულებულ სამუშაოს, რომელიც უნდა ასახავდეს კურსდამთავრებულის უნარს, ჩაატაროს კვლევითი ან სხვა სახის სამუშაოები. წარმოდგენილი ნაშრომის დაცვისას მაგისტრანტმა უნდა წარმოადგინოს მის მიერ შესრულებული სამუშაო და დისკუსიაში მონაწილეობის უნარი.

3. სამაგისტრო ნაშრომის მომზადება, დაცვა და შეფასება სასწავლო უნივერსიტეტში ხორციელდება სამაგისტრო ნაშრომის ინსტრუქციის შესაბამისად. *დანართი 1*

მუხლი 16. სამაგისტრო ნაშრომის შესრულებისა და ზეპირი სამაგისტრო გამოცდის/დაცვის ბათილობა

სამაგისტრო ნაშრომის შესრულებისა და ზეპირი სამაგისტრო გამოცდის/დაცვის ბათილად გამოცხადების, სამაგისტრო დიპლომის ჩამორთმევისა და მინიჭებული ხარისხის გაუქმების საფუძველია აკადემიური კეთილსინდისიერების დარღვევის (პლაგიატი) გამოვლენა.

თავი VI დაფინანსება

მუხლი 17. დაფინანსების წყაროები

მაგისტრატურის დაფინანსება ხორციელდება სასწავლო გრანტის, და თვითდაფინანსების ფორმით.

თავი VII გარდამავალი და დასკვნითი დებულებები

მუხლი 18. გარდამავალი დებულებები

ამ დებულების ამოქმედებამდე სასწავლო უნივერსიტეტის მაგისტრატურაში ჩარიცხული მაგისტრანტების მიერ მოპოვებული კრედიტები და შესრულებული სხვა სამუშაოები გადახედვას არ ექვემდებარება.

მუხლი 19. დასკვნითი დებულებები

1. სასწავლო უნივერსიტეტში ფაკულტეტების სამაგისტრო საგანმანათლებლო პროგრამებზე სასწავლო პროცესი რეგულირდება „უმაღლესი განათლების შესახებ“ საქართველოს კანონის, ბოლონიის კონვენციის მოთხოვნების, უნივერსიტეტის დებულების, უნივერსიტეტის სასწავლო პროცესის მარეგულირებელი წესისა და წინამდებარე დებულების საფუძველზე.
2. აღნიშნულ დებულებაში ცვლილებებისა და დამატებების შეტანა ხდება აკადემიური საბჭოს გადაწყვეტილებით.
3. დებულება ძალას კარგავს ახალი დებულების დამტკიცების შემთხვევაში.